



**REPÚBLICA DEMOCRÁTICA DE TIMOR-LESTE**

**GABINETE DO PRIMEIRO-MINISTRO**

**ALOKUSAUN SUA EXELÊNSIA PRIMEIRU-MINISTRU I  
MINISTRU DEFEZA I SEGURANSA  
KAY RALA XANANA GUSMÃO  
IHA OKAZIAUN SERIMÓNIA ENTREGA RÓ-AHI  
PATRULHA RUA KLASE JACO**

**11 Junhu 2010**

**Portu Díli**

Exmu. Senhór Prezidente Repúblika, Dr. José Ramos-Horta

Exmu. Senhór Prezidente Parlamentu Nasionál, Fernando “Lasama” de Araújo

Exmo. Senhór Prezidente Tribunál Rekursu, Dr. Cláudio Ximenes

Distintus Membrus Parlamentu Nasionál

Distintus Membrus Governu

Exmu. Senhór Xefe Estadu Maiór Jenerál Forsas Armadas, Majór-Jenerál Taur Matan Ruak

Exmus. Senhores Representantes Korpu Diplomátiku

Distintus konvidadus

Ofisiais, Sarjentus i Prasas F-FD'TL,

Ohin, ita hakerek tan ona pájina osan-mean ida iha ita nia Pátria nia Istória foin daudaun nian. Serimónia entrega ró-ahi patrolha rua Klase Jaco, ne'ebé ita foin sosa husi Repúblika Populár Xina, representea timór-oan tomak nia vontade forte atu defende Soberania Nasionál ho rikusoin tomak Nasaun nian, hanesan rezultadu husi sakrifisiu timór-oan barak nian, ne'ebé fó sira nia vida tomak atu defende ideál ida ke sira sempre fiar metin.

Independênsia Estadu ida nian, signifika mós katak tenke iha meius ne'ebé presiza hodi asegura integridade territoriál no funsionamentu normál ba instituisoens sira i signfika, naturalmente, kapasidade atu defende fontes rikeza Povu tomak nian.

Tanba ne'e, ró-ahi patrolha rua ne'ebé sosa atu proteje ita nia tasi ne'e, representa primeiru pasu kona-ba defeza ba beins timór-oan hotu nian, tanba sei uza hodi halakon peska ilegál, ne'ebé to'o oras ne'e provoka prejuízos barak tebes, to'o 36 milhoens dólares tinan ida, ba ita nia Paíz ne'ebé maioria sei moris kiak.

Foin daudauk ne'e, durante ha'u nia vizitas ba Sub-Distritus, ha'u bele haree rasik, katak iha Uatukarbau, “Ró-ahi inan boot ida” akompanha ho sira ne'ebé ki'ik, tama livre lós iha ita nia bee laran, la iha autorizasaun, hodi na'ok buat ne'ebé ita nia Povu mak iha direitu.

Iha fulan Marsu 2008, ita simu tiha ona informasaun, ne'ebé dokumenta didi'ak, kona-ba ró-ahi barabarak ne'ebé mai pára iha ita nia tasi laran hodi tiha na'ok ita nia ikan, no halo sai aat hotu ita nia korais ka ahu-ruin ne'ebé mesak furak iha tasi okos.

Tanba razaun ida ne'e duni maka, iha altura ne'ebá, ita deside katak Povu Timor-Leste la bele husik ema na'ok tán nia rikusoin, hodi nune'e Governu ho aten barani foti desizaun ida atu investe iha konstrusaun ró-ahi patrolha rua.

Maibé, desizaun ida ne'e provoca barulhu uitoan iha opiniaun pública i, liu-liu hetan críticas husi países balu, hanesan Austrália, ne'ebé hafodak tebes tanba la konsulta sira iha prosesu ne'e.

Tanba...tuir loloos ita la bele iha ambisaun atu konsidera ita nia an hanesan independentes, wainhira ita entrega fali ba ema seluk knaar atu responsabiliza ba defeza iha ita nia fronteiras terrestres no marítimas no atu garante seguransa ba ita nia populasoens tomak ho sira nia beins.

I nein bele konsidera ita nia an hanesan Paíz soberanu ida se antes-de ita hola desizoens, ne'ebé fundamentais tebes ba ita, tenke konsulta uluk lai países vizinhos, países amigos no parseirus!

Ha'u mós, dala barak hasoru ema ne'ebé kestiona kona-ba legitimidade halo kompras ró-ahi patrolha rua ne'e husi República Populár Xina, i, iha altura ne'ebá no mós agora, ha'u hatán hanesan deit, katak: "Ne'e problema ida ke simples tebetebes. Simples hanesan halo negósiu baibain ida, negósiu ida ne'ebé bele benefisia Timor-Leste."

Senhoras no Senhores,

Paíz ida ho de'it tinan 8 Independência, ne'ebé sei frájlil tebes kona-ba defeza ba nia integridade ho soberania, hakarak tebetebes atu países sira seluk mós bele komprende, katak ami nia preokupasaun boot liu mak atu garante kondisoens moris ne'ebé di'ak ba populasoens, la'ós atu buka provoca instabilidade rejionais.

Ha'u bele hateten tan, katak buat hotu ne'ebé foin daudaun akontese iha Timor-Leste provoca husi rai li'ur i la'ós husi rai laran. Portantu, buat ne'ebé ami hakarak husu agora, maka atu respeita soberania no integridade ne'ebé ami konkista ona, ho ami nia forsas rezistênsia rasik.

Tanba ne'e, mak, husi kedas uluk, ami luta atu bele hetan direitu hodi hari rasik ami nia

Forsas Armadas. Maski iha konstetasaun barabarak hasoru ami nia aspirasaun lejítima ida ne'e, ne'ebé instituisoens no paízes doadores balu mak protagoniza, hodi buka konvense ami katak ami nia hanoin ne'e la di'ak, ami konsege duni lori ba oin objetivu ida ne'e.

Iha altura ne'ebá, partes balu to'o de-dehan katak hari korpu militar ida bele signifika tau iha kauza demokrasia no liberdade Povu nian. Hanesan fali paízes hotu-hotu iha mundu, inklui demokrasias ne'ebé estávesi no avansadas liuhotu, la iha sira nia Forsas Armadas rasik!

Nune'e, wainhira konkretiza ona projetu kriaun Forsa Defeza Timor-Leste nian, ne'ebé integra parte signifikante husi kuadrus FALINTIL, presiza mós hanoin ona kona-ba defeza ba ita nia fronteira marítima no nia rikezas ne'ebé boot tebetebes iha ita nia kosta.

Ba F-FDTL, tasi mak hanesan futuru Timor nian. La'ós tanba ita nia tasi boot liufali paízes sira ne'ebé hadulas ita, pelu kontráriu, tasi ne'ebé hale'u ita ladún boot. Maibé ne'e pertense ba ita, portantu ita mak tenke tau matan rasik ba nia!

Ofisiais, Sarjentus no Prasang F-FDTL,

Enkuantu hanesan Ministru Defeza no Seguransa, ha'u sei halo buat hotu atu labele lakon soberania Timor-Leste nian, maibé klaru respeita nafatin abordajen geopolitika ne'ebé kompleksa tebetebes.

Ita hatene no sei hatene buka sai amigu ne'ebé di'ak liu entre amigus sira hotu, ita tenke respeita mós sira nia intereses hotu, dezde-ke la tau iha jogu ita nia intereses rasik. Komponente Naval nia propózitu prinsipál, la'ós atu sai marinha de-gerra, Komponente Naval representa uluk liu mak komponente ida husi ita nia paradigma foun ba Forsas Defeza Timor-Leste.

Ita hotu hatene katak bein-estár populasau nian mai husi seguransa no estabilidade Paíz. Seguransa no estabilidade Paíz signifika mós defeza ba nia bee no nia rikezas naturais.

Nune'e, reforsu ba Komponente Naval F-FDTL nian, representa objetivu estratéjiku ida ne'ebé, nein Governu ida, independentemente husi nia kôr politika, bele nega. Meius navais ne'ebé Timor-Leste iha ona, seidak to'o hodi bele kumpri misoens ne'ebé atribui ba

Instituisaun Militár, tanba ne'e mak sai hanesan obrigasaun patriótika no soberana ida ba Governu, atu bele prepara ba Nasaun, ró-ahi lori halo patrolha ba iha nia zona ekonomkia exkluziva tomak.

Ita simu iha 2001, sei iha tempu Administrasaun Nasones Unidas nian, lanxas rua Klase Oekusi, ne'ebé Portugal ho laran luak oferese, tuir programa kooperasaun bilaterál, ne'ebé fundamentais tebes ba Komponente Navál no bele kapasita ita nia marinheiros sira, iha faze ida ke ita la iha rekursus finansierus ne'ebé bele permite ita hanoin kona-ba alternativas sira seluk.

Maibé agora tempu muda ona. Estadu timór tenke asumi, lori nia orsamentu rasik, obrigasaun atu moderniza nia Forsas Armadas, hodi ekipa sira didi'ak.

Naturalmente, ita sei presiza tán tulun iha nível transmisiaun konhesimentus. Ita labele hanoin fali katak ita hatene buat hotu i la presiza ema nia tulun. Maibé, ita mós tenke autónomus iha ita nia opsoens kona-ba defeza estratéjika Pátria nian no prezervasaun ba nia rekursus naturais.

Ha'u prevê mós ona, nu'udar Ministru Defeza no Seguransa, katak ró-ahi patrolha rua ne'e mesak, sei la opera ho efikásia. Governu tenke hahú ona, fó ba PNNTL, Servisu Migrasaun no Korpu Nasionál Bombeirus, kapasidades tomak atu sira bele ezejuta didi'ak knaar kona-ba protesaun ba ema nia vida no rikusoin iha tasi laran.

Ita tenke reforsa kapasidade Komponente Navál F-FDTL nian no atua ho forma integrada, hala'o kooperasaun entre instituisoens oiain, se ita hakarak garante totalmente katak ita nia kosta, labele sai alvu atividades kriminozas, hanesan peska ilegál, tráfico drogas, kontrabandu no tráfico ema, no seluktán.

Hanesan Xefe Governu no responsável ba pasta Defeza, ha'u bele garante katak ha'u sei la tuur hakmatek, sei kontinua fó ba Forsas Armadas, partikularmente nia Komponente navál, méius ne'ebé presiza tebes duni atu nune'e bele ezerse misoens tomak tuir konstituisaun.

Senhoras no senhores,

Ha'u hakarak agradese ba Repúblika Populár Xina ba apoiu tomak ne'ebé fó ba ita, partikularmente ba formasaun téknika ne'ebé fó ba 36 marinheiros, ne'ebé halo parte Guarnisoens ró-ahi patrulha nian, no hala'o iha Xina, i mós instrutores ne'ebé haruka mai Timor-Leste atu kontinua hanorin ita nia militares sira opera embarkasoens ne'ebé ohin entrega ofisialmente.

Ha'u hakarak mós hato'o liafuan ruma hanesan apresu boot ba Ministrus Defeza Austrália ho Indonézia nian, liuhusi idaidak nia Embaixadores, tanba bele permite sira nia ró-ahi mai mós iha ne'e, ohin, hodi partisipa iha serimónia ida ne'e.

Prezensa marinha países rua ne'e nian, iha serimónia ida ne'e, hatudu katak ba tempu naruk sei iha kooperasaun entre países tolu ne'e, ho hanoin atu halo hamutuk reforsu seguransa ba ita nia tasi no fo kontribuisaun ba Páz mundiál.

Ba militares F-FDTL nian, ne'ebé integra iha Komponente Navál, ha'u husu ba imi hotu atu fó imi nia esforsus no matenek tomak ba misaun patriótika ne'ebé agora konfia ba imi: katak ema labele viola ita nia águas territoriais, hala'o prezervasaun ba ita nia rikezas marítimas no satan netik atividades kriminozas iha ita nia kosta.

Buat ne'ebé Pátria ezije ba imi atu kumpri uluk liu mak obrigasaun ida ne'ebé imi simu bainhira imi hili karreira militar, hanesan imi nia dalan moris: mak defeza ne'ebé halo ho aten barani no laran metin ba soberania nasional.

Ha'u fiar katak imi sei la halo ami laran susar i imi sei sai orgulhu boot ba timór-oan tomak.

Muitu obrigadu

Kay Rala Xanana Gusmão

11 Junhu de 2010